

抱經堂文集卷第三十三

東里 盧文昭 紹弓

誌銘

秦封公墓誌銘 己丑

封公諱有倫字天彝姓秦氏吾同年 日講起居注官
翰林院侍講學士大士考也先世太平當塗人祖考應
瑚諸生崇禎末年挈家避流寇之亂道相失其妻方太
君獨攜一幼子九歲者俱卽公考諱邦燦也至杜塘寇
且至度不能脫見前有水則置兒岸側卓著簪令兒識
其處遂自沈後三日應瑚公始求得其屍葬之率諸子
來江寧占籍焉公考舉丈夫子七人公最少年十四割

臂以愈父疾諸兄治生適四方公獨在膝前盡子職有
子教以讀書立品乾隆十二年仲子大士舉於鄉十七
年會試中式時奉

廷對者二百有餘人

天子獨覽其策異焉

親置第一

賜進士及第授翰林院修撰明年迎公京師文昭以年
家子進謁見公神氣內充言語簡重信爲有德人也二
十六年長孫承恩聯舉成進士改翰林院庶吉士公年
登八十親朋捧觴稱盛事公益歛然以盈滿爲懼明年
大士典福建試奏乞事竣歸里門覲省

帝曰俞會

覃恩進階公考暨公皆得贈封如大士官而大士與承恩亦各以其階授公備禮郊迎焚黃告墓既訖事卽趣大士進京供職又數年而目始有眚時大士業已告歸侍養公時與之述先德以教子孫三十三年正月疾作以元夕前一日考終正寢享壽八十有七公平生坦直臨財廉勇於赴人之急有故人言氏子負逋官責之急欲自戕爲代償得免嘗與人共財其人客死有籍所不載錢三十萬其子亦不知也召而還之北鄉某甲兄病狂雉經死甲與乙讎乘闇移屍懸乙門乙大窘踞公前求爲計公直造甲所諭禍福事乃得解然人無知者公

折簡堂文集卷三十一
沒後有以善田來售者但取平價詰之卽乙也始言其
狀且曰吾以報公德公國學生

誥封中大夫 日講起居注官翰林院侍講學士娶曹
淑人先公卒子七人吉士大士彬士元士賢士上士升
士彬士賢士先卒孫六人承恩今爲某官承業國子生
餘某某女孫九人曾孫二人今將以某年月日葬於某
原銘曰

何以基福唯曰德深耕疾芸享其食田於何所方寸域
愛護靈苗去牟騰天在人中此可識自重而耄厚稅植
持以提撕無倦息讀書爲善各識職有欲型家必取式
樂哉斯邱卜食墨銘茲貞石永不泐

贈奉直大夫永順縣教諭費君墓誌銘

丁酉

君諱元傑字渭英姓費氏岳州巴陵人也先世自豫章徙焉居於邑之雙橋山數傳而大多以文學顯名考厚齋公諱某重誼敦行不祿蚤世君是時年尚未成童母王太孺人撫教備至年十八試補郡學博士弟子員嗣是每試輒冠其曹學使者書原潘公激賞尤至文譽大起前後視楚學者若養齋董公渭涓李公咸聘佐衡校之任所取士率滿人望始君之就幕也有致一緘於舟中者君不發封亟投諸水郡守許公熟君行設禮請爲岳陽書院山長訓帥諸生多所成就蓋君之可爲人師者實不徒以其文也事母極孝病禱於神求代不得哀

瘠幾殆其他爲義於鄉里者甚多如請豁瀕湖荒田之租及以鼉鶴灘新生洲歸之學爲學田出資倡脩文廟浚泮池建書院割地以益義冢願僧拾遺骼瘞埋之姻黨中有貧而未娶者輒量力爲之助當郡邑修志時載筆者撫君之實書之而人咸以爲允則孝義之孚有素也娶李宜入與君同德城南有步淪水人病涉君議修築宜入亦出針帶所積百餘金助成之所謂馬頭者是也至今人享其利有佃負租欲鬻其女以償聞而憫之亟焚券更資其嫁生平所爲類若此子四人應豫拔貢生官學教習歷任福建龍巖直隸州知州應泰拔貢生武英殿纂脩任瀘溪縣教諭江西白鹿洞山長應孚縣

學增生應壯歲貢生女二皆適名族孫十一人遜學貴
州廣順州知州志學江蘇崑山縣知縣其已仕者也君
先以長子官遇

覃恩封文林郎妻孺人繼以孫遜學官

誥贈奉直大夫妻封宜人君年七十有二以乾隆十四
年九月十七日卒宜人年八十有六以乾隆二十八年
九月二十七日卒先後合葬於邑之南角山而未有銘
乃因志學之請爲之銘曰

師儒之官古所重也山主堂長隆於宋也故相領之或
侍從也爲文章宗道德統也洛閩誰嗣美難踵也岳陽
鍾英行可頌也含和孕粹學緝綜也衡文式士材見用

也厚德澤物爲後種也有美閩中黽勉共也仕雖不達
享榮封也惛惛幽宮固無縫也不震不泄大無恐也余
斯銘斯徵輿誦也

翰林院侍講學士秦公墓誌銘

戊戌

乾隆四十二年二月丁巳學士秦公以疾終於江寧里
第公乾隆十七年

皇太后萬壽恩科

聖上特拔第一人也而公之終適當奉

皇太后哀詔哭臨之後四日公自聞

國有大卹卽哀痛傍徨不寧厥居文昭與公爲同年生
官階相等時適爲鍾山書院長

詔至之日同班行禮哭盡哀而退語文昭明日早臨當
先至迫歸而疾作入夜更劇次日竟不能至自審病不
可起卻醫藥口占四言十六句以示子孫沐浴而逝嗚
呼豈不異哉今葬有日公子觀察君以銘幽之文爲請
乃案狀而書之曰公諱大士字魯一號澗泉先世有貳
守江南之太平者因家當塗曾祖諱應瑚縣學生娶方
夫人值明季流寇之亂以節烈死事詳先封公誌中祖
贈公諱邦璨亂定後隨父兄來江寧占籍焉故今爲江
寧人考封公諱有倫國學生生七子公其亞也生有穎
質十歲能屬文少長兼精篆隸行草之學求者踵至有
知公貧以金幣請者微察其有德色遽還之一遊淮陽

嗟使幕中間前輩箴規語亟歸竟學以親年老顯揚須及時禱於神願減算以博一第迨壯歲舉於鄉三試南宮獲雋遂登上第授翰林院修撰明年充順天鄉試同考官又明年散館

欽定一等旋充 咸安宮官學總裁入直 武英殿以母憂歸二十二年服闋復官

命教習庶吉士是冬奉

命直 上書房侍 皇子講讀明年

御試詞臣

欽定一等二名擢翰林院侍講學士二十四年京察一等充順天武鄉試副考官旋又奉

命祭告北岳等處二十五年充會試同考官二十七年
充福建鄉試正考官便道歸省封公明年復充會試同
考官既竣事遂請終養歸承歡者閱五載而封公沒服
闋以病乞展假三十五年來京師祝
皇上萬壽逾年又祝

皇太后萬壽同朝諸公見公精神未衰敦勸復起而公
已無復出山之意矣公之勸講 皇子也勤而恪正而
和凡可以啟迪培養者無所不盡至膺衡校之任一字
句不敢苟所得皆真材其主八閩試也同事者適嬰疾
公不辭勞瘁取八千餘卷盡閱之是科得人爲極盛他
若甘肅提督馬公全後死王事於西陲者亦公順天武

闈所得士也少卽工詩邑令袁君枚取其詩以入志追入館閣益得雅頌之體賦專以神韻爲工不專褻積爲古文則自謂得力老泉云嘗恭和

聖製喜雨詩十韻進入蒙

天語褒焉公長子承恩弱冠成進士相繼入翰林洊升侍講出爲江西分巡廣饒九南道公丁寧訓誡其要務在勵廉隅勤職守嘗一至官下亟歸家居怡怡友愛親課諸從子學業公素精於論文決利鈍無不驗嘗一主常之龍城書院在饒進芝陽書院高才生而親講示之無不得意以去近年當事有聘主揚之安定書院者謝勿往也晚年惟愛呂新吾呻吟語取其切要者錄之有

求書者卽視其人之情性有可以爲韋弦者書之其不苟如此公以翰林院侍講學士加二級

覃恩誥授中議大夫祖父父咸如階官封贈祖母陳母曹俱贈淑人妻劉封淑人而承恩亦以庶吉士邀

綸錫焉公享年六十有三子三人承恩江西分巡道署理按察使事承業鄉貢士承家幼女三人長適內閣中書舍人王彝憲次字汪雲森次未字孫男一人繩曾孫女三人長字孫應魁次字王鼎襄次未字以某年某月某日葬公於某原銘曰

始之求名欲爲親榮卒之告歸欲與親依方膺任使華廡可俟決計翩然勇退俸錢生兮若浮死兮若休眾人

惜死擾擾未已治命諄諄旋返其真自挽同潛子姓炎
炎此二端者似公蓋寡余來鍾山得數往還識公學力
晚益有得兢兢畏慎終免緇磷公不可攀余去鍾山勒
詞幽局公兮永寧

贈資政大夫大理寺卿王公墓誌銘

己亥

今大理寺卿王君昶將葬其先贈公也上書

天子乞假歸營窀穸事既

報可卽馳歸卜日得吉謀所以爲銘者向知文昭不肖
爲澶漫响偷之辭其言宐可取信遂以書與狀來請勤
懇甚至文昭其可以苟辭乎哉案狀公名士毅字鴻遠
王氏松江青浦人先世由浙之蘭溪遷焉考諱璵生三

子公其季也九歲而孤少長竭力爲母營甘旨自奉冊
取其至毅者伯兄出爲人後常苦貧時時爲給朝夕費
仲兄沒無後公兼主其祭歲時對几筵輒泣然興哀檢
身治家嚴而有法有犯者置不與校嘗擇經語十二條
取史事附著之以朝夕自鏡因益悟誠中爲立身行己
之大本誠則未有不形誠則未有不動顏子居陋巷言
語不多見聖人乃亟稱之諸子皆自以爲莫及漢黃叔
度徐孺子管幼安之倫皆終身隱約而當時稱之後世
信之此於人世文章功業有弗藉焉矧富貴利祿耶公
之志趣見於言者如此子就傳後每夕爲陳說通鑑事
又取古來名臣碩儒自屈子而下止於明季凡百二十

人本傳總編之命曰百世師錄俾誦習之引其志使不落於庸近也同時宿學者德咸取其書以詔學者乾隆九年八月二十二日卒年六十有四以子貴三遇

覃恩初贈文林郎內閣中書舍人再贈奉直大夫吏部考功司主事今

誥贈資政大夫大理寺卿妻陸氏三贈至夫人子一昶以文學著稱進士出身今官大理寺卿孫女一適吳縣嚴榮昶以乾隆四十四年七月壬辰合葬公與陸夫人於蘇州崑山縣之雪葭灣從先人也初公葬其考於是土人謂其年於方不利率眾阻之公不能抗歸而慟哭至絕復蘇今昶之葬公也亦猶公之欲葬考也豈能一

日忘哉然方貧賤時思有待以榮其親既涉仕途義不敢私其身從役萬里飛書馳檄計不反顧迨乎綏定而還策勳飲至

天子念勞臣積階至二品

綸誥蜜章推及三代鄉里益嘖嘖稱公爲善教子子奉朝命歸葬更爲非常之榮世有君子當快其遇而更憐其志之至是而始遂也銘曰

木生火爲光明火不離木子父道以成不求名而名不求榮而榮教子義方實顯實揚歸從先人無忝所生體魄孔安曰鍾厥祥其以下子子孫孫之慶

都察院左副都御史提督山東學政忍廬黃公

墓誌銘 辛丑

公諱登賢字雲門系出徽之程氏祖大城縣學教諭諱
華蕃少失二親母舅無爲州同知大興黃公諱爾悟養
以爲己子遂從其姓著籍爲順天人考侍郎諱叔琳學
者所稱崑圃先生也以進士高第陟館閣柄文衡歷封
疆享高壽終妣後武夫人侍郎公年三十七而生公雍
正二年舉順天鄉試年才十六父不欲其速化會撫浙
撫以自隨母卒於里第亟奔喪歸侍郎公爲怨家誣奏
欲中以危法

憲皇帝察其誣但令在海塘効力當是時公方弱冠感
家門顛沛祖母吳太夫人年高懼其以憂致疾時時依

膝前解慰弟登穀尚幼公以家督措傾扶危形神交瘁
猶以餘力兄弟相勉學問切劘無虛日侍郎公旅羈吳
中八年少得以解內顧之憂者繫公是賴中間與其弟
更代來南省視兼得從諸名勝游所學益進乾隆元年
成進士分部學習得戶部河南司額外主事越七年實
授江南司主事轉員外郎又二年進陝西司郎中皆在
戶部長官器公才能剴繁常令兼攝他司恢恢而辦洞
悉利弊吏不能欺遇興革大事推公定議奏上靡不報
可爲尚書海公望撰

皇后躬蠶儀

上覽之稱善詢何人爲之海以實對由是擢廣西道監

察御史遷吏科給事中轉刑科掌印給事中巡視通州漕務丁憂服闋補戶科給事中再任刑科掌印巡視江南漕務前後任臺察給諫凡十一年所陳奏皆切於時務可施行者山東災運奉天河南天津米接濟公言如此則東省西界北界爲有備矣惟青菜距濟東窻遠利津昌邑以南諸縣山徑崎嶇陸運復不易謂宜豫糧仍舊運通而以南漕如數抵撥近從淮安鹽城出口由海港直達沂州府屬之夾倉口青州府屬之宋家口萊州府屬之膠州東門外海口分貯平糶則東界南界亦俱得資接濟又言飢民就食他方向有留養資送之例然其中有本來游惰之民無業可資轉以荒年爲幸及資

送回籍往往成羣滋事有於經過鄉村搶食作踐者臣以爲賑卹之恩難容濫及遞送之例當有區分被災之區自有賑濟勸其毋輕遠出其已出者惟老弱殘疾留養外餘聽其自爲謀食至願回籍者陸續資送按日分遣多不過三十人如有強梁之人混入隊中者卽繩以法別行遞解回籍庶乎主客相安不受外來之擾其他如除幕客盤踞省會之弊杜經紀巧昂錢價之害提比捕役專責成府廳磨勘試卷令考官迴避漕丁餘米許在通出糶諸議咸奉

旨允行廢員劉光訓以縣丞署知縣被黜賄通文選司書吏藉起復原官文躡補知縣公劾奏論如法其巡南

漕歸也復

命稱

旨擢太常寺少卿尋遷光祿寺卿又升授太常寺卿蓋
駸駸嚮用矣會

上御門班退公素短視不知

駕猶未起卽於班後憩坐部議革職及所司別請
簡人復奉

恩旨畱任三十二年改宗人府府丞明年擢都察院左
副都御史

命往湖南審覈茶陵州城工覆 奏有平允之

襄又明年授倉場侍郎甫三月

簡署漕運總督是冬實授加兵部尚書銜公在農部久
又兩任巡漕於漕政素熟悉處置輕重咸得其宜丁有
所資運乃速達明年督運北上
命隨軍機大臣同入見

眷顧方殷公因越常例奏請調劑湖南疲幫并水次州
縣建倉事宜且請親往鎮江察勘挑濬奉

旨申飭部議降調去官需次當得運使

上加恩以三品京堂用三十六年復補授都察院左副
都御史三十九年奉

命提督河南學政

特調山東蓋是時壽張賊初平士習民風亟須整頓

上以公有威重故改用公公之生也侍郎公正提學山東今相距六十六年而復繼斯任凡整飭士習崇勵風教一以先侍郎爲法先是東人於大明湖三賢祠增祀愚山施公及侍郎公爲五賢祠公至瞻謁重加修葺并置祭器且默自矢以毋貽先侍郎之玷視事年餘恭遇聖駕東巡於界首祇迓

上見公容瘦

諭加意調養蓋公唯以盡職爲念雖積勞成瘵而猶不自知也

恩賜之隆亦視前學政有加是夏按試曹州閱卷不異常時忽命子嘉績具遺疏且曰生於山東死於山東命

也生於學署死於學署數也吾分止此夫復何憾目注
書笥他無所屬至夜端坐而逝時乾隆四十一年五月
十二日也享年六十有八公奉侍郎公極孝自以生晚
不及親見父少壯所行事每於燕閒侍談隨得輒錄今
所傳年譜率本於此學不務雜以小學近思錄爲主文
弔館公家每好糾梓本書籍之誤公曰讀書以求益也
今書并受君之益矣余知其以此規我也娶曲阜孔夫
人襲封衍聖公謚恭愍女操身儉約有文采而不肯自
著見先公二十八年卒子五人端絨縣學廩生早世景
緯拔貢生今知江西安義縣嘉績以臈錄議敘分發江
西候補縣丞符綵進士今知浙江台州府脩純府學生

早世女三人一適舉人河曲縣知縣張德洞一適監生
四庫館膳錄陳箴一適進士戶部主事包愨孫六人應
桐縣學廩生仲馥府學生季馨泰寧進冠文衡公豫作
遺教置書笥中令耐葬祖塋官階祇稱見在不可仍稱
總漕前銜母以浮詞長語作行述公子遵其教以某年
某月某日葬公於韓山祖塋之旁來乞銘嗚呼余之不
工於緣飾也公素知之已銘曰

出自貴介庸愈孤寒服官三紀左瓢右簞退食一編無
營無競生斯卒斯信知有命卽事求理坐言可行再蹶
再起

帝嘉老成鞠躬盡瘁聿追先德前光後輝東人是式全

而歸之韓山之原上配若考下啟後昆

封儒林郎翰林院編修邵君墓志銘

甲辰

嗚呼士有績學砥行以沒其世而不能自致身青雲之上所蘊不得以大發舒於時此交遊知識之所爲重大息也雖然屈伸顯晦之理猶夫陰陽晝夜之代嬗終鬱不燿理固無之旣不於其身必於其後人吾以此驗諸人世往往而合今吾鄉邵太史請吾銘其先君子之墓因得以悉行履之詳亦吾言之一徵也案狀君諱佳銳字藉安自宋南渡來世爲紹興府餘姚人曾祖琳前明進士山西洪洞知縣祖炳縣學生贈修職郎考諱向榮由舉人會試中式內閣中書改知縣終鎮海縣學教諭

贈文林郎翰林院編修前母陳氏母蔣氏俱贈孺人教諭君年過四十未有子禱於神夢神自書叢中紬片紙授之已而舉君占者曰書種也祖母張鍾愛特甚比就傅不程以所業少長會季父徵士坡自京師歸教里中君諦聽其旁卽能爲人演說因試之文振筆立就家人咸訝其何遽能是也自是從季父學學日進繼隨教諭君於鎮海鎮海之士咸推服焉君於文不隨俗好識者以爲在明江右五家中與章羅酷相似亦嘗以諸生試高等宜可以食餼矣顧缺出蚤晚無一定卒不與相值僅補增廣生鄉試屢黜而君志氣卒不少挫居貧所守益峻其天性之篤也嘗侍嚴親疾不解帶者五閱月夜

則究岐黃家言遂通其旨劑量醫所處方飲之愈季父
客會稽而病君在鎮海聞之疾馳往奉以歸會稽至餘
姚僅二百里而舟不能徑達中隔以曹娥江輿轎登陸
肢體不得展舒渡江再易舟又過兩埧牽挽上下始達
於姚江病者苦煩聞邪許之聲不堪尤甚君於陸行輿
以涼牀施幕其上風日不侵過埧則約滴水爲號以齊
眾力輓轆無聲而舟已進其用意體貼入微若此教諭
君旣告歸君事二親曲盡其歡疏小圃以娛之日求所
嗜以進之以親居北方久溲麪效北人爲餽飪親食之
甘於論著之散見者皆爲緝綜成帙與季父遺書並藏
之唯謹邑有介士徐君義不受人之周母病君託言負

其家金厚遺之後其母死又鬻田以爲贖其勇於義率
此類雖家人未盡知也晚年喜話易詩文偶一爲之多
出人意表以乾隆四十八年九月乙巳卒年七十有二
及見其子貴受封文林郎晉封儒林郎如其子官妻袁
氏封安人子三人履涵蚤世晉涵乾隆三十六年舉禮
部試第一人成進士官翰林院編修鼎涵國子監生女
二人適名族孫六人秉恆秉仁秉華秉理秉章秉瑞以
卒之明年十二月某日葬於邑文山之南原銘曰
吉夢神告誕生文人誰之不如而鬱湮不伸其行可式
又進於文孝乎惟孝而乃醇乎醇嘗藥知醫巧變入微
泆而爲義欲人莫知是日隱德天其知之及身食報有

子而才有子而才眾推班揚領袖南宮潤色玉堂錫以
清資方來未艾瀧岡之文將母有待見託下走作此銘
詩雖曰不文庶無愧辭

浙江杭嘉湖海防兵備道周公墓誌銘 乙巳

公諱克開姓周氏字乾三號梅圃湖南長沙人乾隆四
十九年七月二十日以疾終於浙江杭嘉湖兵備道任
年六十有一士民悲悼相與言曰天胡不俾終惠我民
邪大吏以聞

上深惜之公子內閣中書舍人有聲聞喪星奔將奉公
柩歸鄉以葬匄余爲銘余嘗見公於江寧又客太原爲
公舊治故老猶能述公治行公子以余嘗典學於其鄉

師事余是不可辭案狀公以鄉貢士中乾隆十九年會試明通榜引 見發甘肅以知縣用蓋勅舉也值甘肅軍興卽協辦軍務署張掖古浪實授隴西調寧朔凡歷四縣擢知固原州以憂去復補雲南姚州知州特擢貴州都勻府知府調貴陽緣事罷復用爲山西蒲州府知府調太原擢授江西吉南贛寧道署布政司使事坐失出遊書案吏議効力軍臺

聖恩許贖罪卽 命往江南以同知用署知江寧府事特除江西九江府知府調南昌未幾卽擢浙江糧儲道調補今職此公敷歷之本末也性勁直不以依阿骫骳取容所至爲民興利必計長久治獄必當其罪於威勢

無所瞻畏雖以此取怨怒勿恤也大吏久而知之屢以
最聞

聖上深悉公任事有風力故再折再起不久淹也寧朔
舊有漢唐二渠與大清渠而三百姓資以灌溉唐鐸
堡之地有暗洞焉以泄濱湖宿水修治不善漢渠之水
不行泛濫爲害議者苟趣目前欲加填塞寧夏利而寧
朔不利公堅主修復時春月資水甚急民以不及待相
阻撓公期以五日可就及期夏民羣持畚耜來擬不就
卽填塞耳至則工已垂竣反相助爲盡力蓋公蚤籌度
某所有石可用某項有錢可借故能成之之速如是縣
民間姓爲旗人所讎叢毆致斃旗員以獲偷拷問爲辭

公驗狀非偷且身有傷須考實將軍聞之大怒詰以不當株連公據律令爲對竟致兇渠於法一破姑息之習人皆以爲快在太原修復屬縣之風峪口隄堰以除水患往時每爲姦民佔荒者浮議沮其事及聞公往勘復蟻聚蜂擁洶洶馬前公陽言吾不審當若何試推曉事者導吾往得三人械之以行曰若率多人將復抗我耳有繫吾馬者必置若法眾紛然各散去於是沿隄行視隄互十數里其尾爲水所決瀾漫平田中無所歸復循而下則汾流帶之中隔民田公以開田償直詢諸民民曰以濼田易永利某等願不受直隄卒以成民因爲祠以祝公公於臨財廉亦不以賂要結上官近年甘肅浙

江官吏皆以賊敗而公絕無連染當時誚公迂者舉皆喪身亡家公獨安於其官獲保令名以終嗚呼仕者不可知所自立歟公督修海塘當潮汐之衝每苦墊陷晝夜不離工所積勞冒暑以至於大故豈不哀哉舉此數端亦可以見公之崖略矣祖諱炳父諱宣智舉人激浦縣學教諭以公貴 贈皆中憲大夫祖妣某氏妣侯氏皆恭人公初入仕授文林郎妻張氏封孺人後所得階封皆以貤贈子三長卽有聲徵仕郎以中書充歷代職官表纂修官次有度早沒次有蕃孫二鳴鸞鳴鸞女四人壻皆士族三已嫁一許字未行卜以某月日葬於縣之某原是宜銘詞曰

惟禮有云勤事而死則祀之公之盡職自初仕國功民
功燿前軌尸而祝者徧畏壘行書其實上太史報功有
典俾筵几神則如水魄在是以此爲清白吏歸全之所
詎不美乎

黃母方孺人墓誌銘

辛丑

今之卜葬者吾惑焉以父祖之骨爲子孫博富貴之具
而一奉命於地師地師之說又言人人殊交持而不相
下則狐疑而不敢決迨世逾久則枝逾繁宐於孟者或
疑其有害於仲若叔若季亦惟恐其不利己也交相遷
延寧使其親棺朽骨腐終不敢輕議葬事達官富室揚
揚然伸眉抵掌出入光輝諸事恥不若人獨至於葬其

親反不得下比於雙人子之蓬顆蔽冢猶得以安體魄而無暴露之患此其人於天下豈少也哉使其聞潮陽黃母方孺人之事寧不愧焉孺人普寧方氏諱淑考憲詔四川重慶府同知及笄歸於黃是爲同菴府君諱應泰舉拔萃科應

廷試候選儒學教諭歸而復舉於鄉得乙榜未仕遂卒同菴始爲諸生時娶孺人患前妣郭孺人墓地卑下將改卜孺人力贊成之於時祖考妣之喪猶在淺土則以從祖兄弟人多議不一同菴之父雖能不惑於形家之說然猶慮持之過急則應之反緩乃延地師爲兄弟所信服者於家令其擇地孺人主中饋之事必豐必潔惟

恐少怠彼將不肖盡力如此者數年地師感其意良厚指一穴謂其眾兄弟曰此最吉眾兄弟咸以爲然於是遂葬實孺人之陰爲相也旣而良人先卒君舅後亡督諸子獨肩附棺之事蓋視前此少易焉則孺人之素行孚於人者深也近三十年中黃氏之門遂無停喪不葬者豈非見理明決而又善於委曲調劑故事集而內外安之無異言噫可謂難能也已其他閨門細行不悉書書其大者子五人長霖次鳴鸞皆諸生次象璣國子生次作乂先卒次雲章國子生女一人適海陽鄉貢生陳雄略孫七人蓮峯瞻峯皆諸生餘皆業儒以乾隆四十四年二月五日卒年八十有二同菴君已前葬諸孤重

於啓窆乃以明年十一月六日舉孺人之喪葬於縣竹
山都長美坑之原距同菴塋域僅數里未有銘其女夫
余所取士也重以爲請乃銘曰
不裂而泄不齧而缺地不違天爰得吉穴昔孺人之安
先人也今後人之安孺人也昭爾子孫後先一轍

馮恭人墓誌銘 王寅

恭人氏馮爲代望族考諱元方廣西按察司使母王淑
人馮公與四川布政司使陽曲李公諱如蘭交相善也
遂以恭人歸李公次子天培由進士歷郎署出爲湖南
衡永郴桂道復授廣西左江兵備道官罷恭人偕歸里
中凡十有四年而卒年六十有七時乾隆四十有六年

九月三日也逾年十一月某日葬於太原縣許丹村之原先期以狀來請銘余素知兵備君之賢今乃知蒸人實有助云蒸人少隨父任兵備君奉父命就婚焉旣而應鄉試歸馮公止一子聘兵備君之妹亦命之蜀就婚旣行而馮公疾作蒸人忘其將免身者日夜左右奉湯藥唯謹生男三日而馮公疾革卽彊起茹哀視附身物無一遺憾又懼母夫人年高不宐過哀所以調護扶掖者無不至洎與弟扶柩歸代以積勞幾濱於危逾年始差布政公以王淑人所生止此女不堪遠離命且畱侍母久之布政公卒官始歸奔喪家旋被籍至無以給朝夕蒸人安之無愠容迨兵備君仕於朝蒸人奉姑曹

夫人命送小姑嫁來京師未幾復至代由代至太原由太原至京復至代十餘年中往還殆無寧歲兵備君家貲既盡所得祿不足以給裘葛僕馬費士大夫舉京官之貧者必曰李君而君彌自刻苦微特不受非義并不輕從人乞假恭人仰事俯育黽勉有無坼鈿移繡辛苦備至兵備君乃得壹意職事絕無內顧憂既而從宦衡陽南寧以遠離二母居常悒悒聞當鐫秩喜謂兵備君曰今乃獲偕君歸事老親矣歸二年而母王淑人卒又四年姑曹夫人亦卒侍病送終備盡哀禮恭人爲女爲婦之道盡矣以夫貴 誥封恭人子二長德申增廣生員次錫璉殤女四皆適宦族孫二應垣應均銘曰

處素貧易處暴貧難雪霜驟至當之鮮歡幸爲男子專
奉二親女也及笄辭家適人豐約一致恩義無二天鑒
孔明威遂其志以亨其迺以榮其身同德賢夫無或緇
磷井椀旣具高邱之原銘以考信我詞不繁

談孝貞墓誌銘 乙巳

女子外成以適人爲家者此人道之常也離已之父母
而事人之父母義則有降而情則無降故已嫁而孝不
衰者稱焉若夫兄弟凋零幼孤未立懼親年之易老傷
左右之無人撤環瑱以守貞奉盤匱而致養遇值其變
則其事爲尤難有若江寧談氏孝貞女者名淑範且泉
君之愛女也母許夫人女善承兩親意自小卽願長依

父母及笄聞將爲擇對則涕泣終日且泉有兩子先喪其長子其遺腹幸男也而次子又夭女願供子職之志益堅未幾母亾長嫂又相繼逝天倫之樂生人之趣且泉舉無得焉女上承下撫綜理井然復勸父置側室親擇端謹者令視寢舉一男今已就傅矣其孫授室後亦生男且泉今乃有子有孫且有曾孫矣是皆女辛勤鞠養之所致也性嚴重寡言笑家人咸憚之以乾隆五十年六月十九日卒於室年四十有三其父痛之甚以其年十月十九日塋葬於祖塋之旁請余爲之誌并銘之曰

女孝而貞國人所稱在室伊何降醅相仍生子然意

先志承扶厥微緒家用是興先聞其鄉有萬孝女十指
養母相依白首昔惟北宮今乃有侶迹殊志同孰敢輕
不卜茲幽宅日月其良魄歸於土神或在堂

弟子定遠凌和鈞雲韶校

抱經堂文集卷第三十四

東里 盧文弨 紹弓

誌銘 附哀辭祭文

贈奉直大夫煥文吉公墓誌銘 癸未

公姓吉氏諱曦曜字煥文鎮江丹陽人也先世自山西徙焉四傳至邵武府同知貴和明初以孝弟徵入官廉惠著聲郡志書之其在嘉靖時有御史棠上疏斥張璉桂萼之議禮爲曲學阿世及請召還故相楊一清事皆見明史是爲公五世從祖祖諱象乾有二子伯諱大兆公考也仲諱大祥兄弟白首熙熙無閒言仲老無子而公考有子三人遺命以季子爲仲後卽公也公事所生

翁之教也遺譚拘亦欲侃侃追前模銘幽宮者其人慮以貽來葉辭非誣

贈中憲大夫鄉飲大賓作菴劉公墓誌銘 戊寅

乾隆八年予始晤香山劉舍人於外家張鳳麓先生所先生前以學士典學粵東舍人所首拔士也學士門下士予不盡識獨識舍人愛其淳厚退讓有古君子風因以知其稟承於家先生作菴公者有素舍人歸里後越十有二年而舍人之子有官比部於京師者相見亟詢其大父父皆無恙爲之喜甚是時作菴公年九十有九越明年百歲例得以建坊請大吏以聞朝之貴人重公名德壽考亦相率爲詩文以壽而公乃卽於是年捐

館舍是爲乾隆二十有一年二月二十日也舍人將免
喪復來京師盡輯諸公前所爲壽言什襲之以歸見公
之生平可徵信者如此歸卽將營葬事求文以納諸幽
於是以狀來請予交公之子又交公之孫雖不文義其
可辭案狀公姓劉氏諱清字泳斯作菴其號先世在宋
時從彭城遷香山之德慶鄉傳至公十七世父長祚母
方氏生公八歲而孤母守志翼公於成居貧藉女紅以
得食及公少長痛其母之劬也乃慨然棄舉子業以治
生家漸饒母乃願公而泣曰而父夙嗜學不幸蚤世不
顯余年廿八稱未亡人流離荼苦常恨不卽從而父於
地下不圖及見今日然迺父之志其尚不止於是公聞

之長號失聲因是課舍人兄弟頗嚴延名師以教之至
今子若孫皆讀書守禮爲儒者起而仕宦皆有聲公好
行利濟事邑南木橋久不治公易以石西有岐江設義
渡便往來者歲饑出私穀千石佐振常爲邑人倡有佃
死孤弱養失田無以活遂弗易佃租入不足一不問其
他施濟多類此晚年以家廟未立居常怏怏及告成舉
祀事扶杖詣廟肅衣冠載拜乃大喜邑中歲兩舉鄉飲
酒禮公常爲大賓以子貴

勅封修職郎晉文林郎又以孫起鯤貴復 馳贈中憲
大夫娶徐氏贈恭人先公十年卒子二人長錦金華縣
丞次濤辛酉科選拔貢生 內府中書科中書舍人

誥封中憲大夫女二人李英光鄭燕其壻也孫十八孫
女五人曾孫十六人曾孫女十一人元孫二人元孫女
一人銘曰

既富且壽康寧考終惟德攸好惟福攸崇既醉之章爰
備五福從以孫子克享天祿何嗇於若考豐於厥身匪
唯豐身利其後人母節子孝宗緒是延天之報施豈曰
偶然鴉鷄之原祖魄所藏後先百歲鬱然相望不崩不
阤不震不泄貞珉在中永不磨滅

鄉貢士盧府君墓誌銘

庚辰

府君諱國佐字遜及號均疇與余同出自涿世居永定
之大塘凹祖諱珪邑諸生父諱某舉丈夫子六人君爲

長康熙五十六年舉於鄉再上公車不第以乾隆二十年某月某日卒年七十有二娶某氏有子七人其第五曰如纘挾化居術寓揚州乾隆二十四年余往揚州如纘聞之來見余曩與其宗人監利縣丞殿人者敘昆弟之好如纘輩行與之同而齒長於余亦鴈行也謂余曰吾將以明年歸葬吾父以銘句子不知爲狀余謹謝不能他日至越永定族人多有在越者教諭觀源亦適以計偕至與言及之則知府君素爲鄉黨所敬服其欲爲義而不克者推府君爲倡卽事無不集事有紛糾不可理者府君發片言人不敢有異議兄弟怡怡如也終身無幾微辭色之忤噫可爲有德君子矣乃爲之銘曰

爲善於國不如爲善於鄉君有太邱之德不以之自名
有彥方之化不以之自功歿已逾紀而鄉人懷之至今
不能忘吾得於君之子者畧而得於羣子姓之口者特
詳有高者邱魄所寧耶子孫賴之後其有興耶

待贈文林郎增廣生毅齋陳府君墓誌銘 丁亥

夫不知其父兄觀其子弟而可矣海陽有陳生雄畧者
乾隆三十年余奉 命主廣東試所貢士也其文閱以
肆甚愛之旣乃延之湖南學政署中所往必與俱衡校
文藝極精敏嘗從永順放舟而下灘流湍悍舟回轉顛
簸於洪濤巨浪閒幾不測又從辰赴沅適大兵之往滇
者亦將至昏夜疾馳雨甚山路犖确湖水奔注碎旬若

雷擔夫皆股栗生自若試岳州日驕陽酷熾通夕汗沾
濡蠶蟲嗜人肌膚交扇揮之不去生於此時秉燭披閱
達旦不言勞噫余何以得此於生哉生將辭予歸予尚
欲生畱則以告曰雄畧將卜葬吾母也且請曰昔先君
子之葬也銘隧之辭尙闕今願併有述也其狀曰府君
諱萬盛字君冕海陽縣學增廣生員世居縣之龍津都
古樓里考天純文昌縣學訓導有五子府君行第三幼
嚴整若成人逮事王父曲盡其驢不妄交遊所與友終
身不渝教督子孫一言動皆有規矩子三人長嵩齒以
文學與府君同受知於學使者在諸生高等食廩餼蚤
世次卽生也舉人季曰雄思諸生孫五人本文章程本

袁章洛本高章程爲諸生曾孫二人府君初娶於李生
嵩齒而歿繼娶於王通詩書善視前子舉生及雄思望
其爲善士不姑息事所生孝父官南澳守備旣老迎養
於家生死咸盡禮生平從不佞佛其持家一切具有法
度府君卒於乾隆十六年某月某日年六十有七王孺
人以乾隆二十六年某月某日卒後府君十年年六十
有八府君與元配前已合葬於縣之曲灣山今以王孺
人耐是歲乾隆三十四年十二月某日也噫予雖未見
府君而以生之言行考之固知其來有自爲之銘曰
昔吳惠公以經學迪海邦孰克應之君父子則同君之
學行匪唯文雄顯不於其身在其後人雖弱一个二難

譽振仲實贊我忠我實多美哉義方我銘匪夸

文林郎錢塘縣知縣魏公墓誌銘 戊子

公諱顥字陟菴世爲南樂著姓明兵部侍郎介肅公諱允貞公高祖也考諱體仁永清縣學訓導母宋孺人公稟至性三歲祖母谷孺人病公隨司訓公侍側不少離持匕箸勸食飲不嘗不敢退康熙四十一年以縣學生舉於鄉四十五年成進士先以家貧常客外謀養凡十餘年及登第歸二親皆年高遂不出食上必在左右偶近行值風雪家人意未卽歸將進饌公已趨而至矣連丁內外艱服除謁選五十四年授杭州錢塘縣知縣縣附藩事至劇吏易爲姦公下車首先潔己罷民一切供

應向時相浴如倉胥供署中食米屠僧供肉江步供薪
獻戶供魚之類一旦盡革之民大悅晝謁諸上官以晨
夜治簿書斷理獄訟無留牘無遁情吏相顧戒曰未見
有書生如公者也減正賦耗羨諭輸租者以時輸予終
不銀鐺女桁楊女女第勿使予不中程於是當輸者咸
相勸輸勿累公課更最故時徵漕米入倉主倉吏餽官
千金公笑曰彼無故而坐捐多金非人情其姦不待問
也自止於倉親評米高下令納者自操量畢徵吏無私
焉杭有駐防旗丁多不戢市物薄予之直伺婦女出道
上恣笑謔民病之有司以非所隸不詰也公至輒移所
司論罪遂相戒勿犯魏錢塘先後中丞徐公元夢朱公

軾皆嘉歎以爲能瀕海塘歲修費不訾時議欲令民出家財以佐公且謂紳士當爲倡者公與海寧陳太史同年上官令往諭意公察不可卽往謁陳母不數語馳還白曰豈惟陳氏浙士皆無貲也且此例一開貽患無窮事遂寢縣志自明聶公後閱八十年不修公開館延儒士搜輯成書三十六卷所識拔於童子中者如孫灝任應烈汪振甲後皆有盛名分校鄉試亦得人五十七年冬自劾去官時勢豪與民爭塋田公直民上官有右豪者公不自得力勻去無以爲辭則以庫貯前政所補金色微惡及民輸錢之當易銀者未盡內二事坐虧空免百姓籲畱者數千人或願持金代償上官意亦悔後卒

偕中丞疏請還公職公堅不起家居十二年以雍正九年十二月十四日卒年六十有八所著有且齋草四卷娶武孺人崇禎壬午舉人殉難諱緯孫女性淑慎事舅姑孝持家以勤以康熙四十年三月二十五日卒公自有狀繼娶李孺人以乾隆二年七月十五日卒子一則乾貢生孫男二長大名乾隆三年舉人青縣教諭次大器孫女三長適縣學生王宗曾次適濮州國子生黃楫岸次適清豐縣學生李遐年曾孫三曾孫女一公子乾隆九年卒公孫大名以乾隆十七年十一月三日始克合葬公暨兩孺人於城東南三里魏家莊之西原未有銘又十四年介大興吳侍讀肇元持其所自爲狀來求

東坡先生集卷三十一
余文追而納諸幽余生仁和與錢塘同郭公之澤得及
焉公去杭時余甫二歲長乃得耳熟公治行又讀公所
爲邑志文獻賴有所考且與教諭君同年舉順天榜義
皆不可以辭適校士湖南卒卒無暇以爲又二年官罷
乃克踐前諾詮次其事如右而繫以銘銘曰

脫穎而出善刀而藏官不爲久治則有聲越五十年遺
愛未忘昔卬今皤口魏錢塘處膏却潤作法戒涼孰秉
史筆登之循良有鬱者阡宰木成行銘公之績繫杭之
氓

奉直大夫吏部文選司主事汪君墓誌銘

王辰

君諱孟錫字康古姓汪氏先世自休寧遷桐鄉至君考

又遷秀水遂占籍焉曾祖諱森戶部郎中階中憲大夫
富著述世稱碧巢先生者是也以弟內閣中書諱文桂
次子爲後諱繼燦由鄉舉歷官吏科給事中巡臺灣君
祖也考諱上增大理府知府兩世階皆奉直大夫大理
生四子君爲長幼穎悟善屬文自其年十五六時從宦
至京師先達見其文已奇之旣益好古文辭家有裘杼
樓藏書多先代善本歸里盡發篋讀之務爲博綜又益
購所未備或鈔寫以足之君之弟仲鈔才名與君相上
下好學與君同又得同志友二三人朝夕相與鏃礪所
爲詩若文駸駸及古作者名譽大起又好訂金石文字
得古泉壘壘時復攜行笈中備考核大理卒於雲南奔

往扶櫬歸母祝宐人已前卒遂合葬焉乾隆十五年與仲弟同舉於鄉人咸以得二俊爲主司慶二十七年

天子三舉南巡之典君獻詩并所著龍井見聞錄十二卷得

旨畱覽 賜緞二匹試入高等 特授內閣中書大臣重君凡

上有所纂輯輒以君攝其事精核爲一館最三十一年中禮部試奉 廷對

賜進士出身不改官又三年遷典籍以賞深旋改授吏部文選司主事精勤能舉其職以君才御史郡守可計日而至乃任吏部未一年年始登五十而遽殞矣其卒

之日乾隆三十五年五月二十八日也以修書勞加一級後一年遇

覃恩以子官贈奉直大夫所著有厚石齋詩文襍著凡若干卷皆可傳君嘗欲盡梓曾大父碧巢遺書而力不逮仲弟亡不忍其無傳爲梓其遺詩數卷又梓亡友萬徵君光泰詩萬垂歿盡以所著託君君亦將爲次第刊布而不虞其不及爲也然君於兄弟朋友之道則至矣初娶舅氏海寧祝氏今贈宜人生子如藻如澈宜人父維詰內閣典籍繼娶仁和金氏封宜人生如洋治猷三女長字朱某次字錢某其幼未字宜人父姓今禮部左侍郎側室范氏生承澤君仲弟無後命如澈後之年十

七殤又命如洋爲之後今爲縣學生如藻舉人官國子
監學正予與君舅氏同官習君才名久及相見歡甚君
中第之歲予分校禮闈聞唱君名滿堂皆大快 朝廷
第羣臣所上歌頌凡君代他人作者率在選君卒之前
月予來候君不得見予無位於朝訃者不及予不得哭
君柩前意常慊慊今孤如藻將以某年某月日子葬君
於某縣某鄉之原來請銘其曷可辭銘曰
瀛州華選以待俊彥胡獨遺兮材則輪囷而貌遠遁世
皆知兮無援於人又阨於天年止斯兮視仲非促視萬
有祿又佳兒兮欲乞君文今反銘君詒此辭兮予石深
刻藏之不泐期無期兮

文學陳少雲墓誌銘

癸巳

余與少雲友也情則兄弟也兩家居相近少雲考曰內
徵府君母謝太君少雲長余三歲方余母馮太恭人免
文昭時乞乳於謝太君兩家子在襁褓中妯嫗數提抱
往來更相子也旣而少雲讀書家塾余往就之同受業
於沈武曹先生元斌情彌厚少雲英敏雖習舉子業時
時取資治通鑑讀之於歷代興廢離合之故人品邪正
之分無不了了時過先贈公所率胸臆劇談先贈公每
稱善數試不利星家言當改業不從竟補博士弟子員
家貧欲出遊余在京師招之同館於大興金氏其文日
益進鏡削刻露鋒凜然不可犯書宗顏平原無論正草

大小率懸臂書之嚴整迥勁幾於逼真每據案作書楮幅必正向教弟子亦如是曰此卽柳誠懸意也年餘仍歸里課徒盛暑肅衣冠正講童子有治經未畢遽請學弄筆作文者不許束脩所入無幾終不肯以貧語人以此常困旣而翻然曰柰何以貧累吾親乎吾父兄皆以理人術佐長吏吾將繼之遂偕其異母兄復之京師遂就幕而南足以衣食家口矣未幾其同產弟在里中以病歿少雲念母老已又衣食奔走無人侍膝下每將戒行李哽咽不自勝居常謂人曰兄弟如左右手今吾一體亡矣何能獨生在江西德興縣幕病作伏枕蘸筆爲書數千言與母訣自恨不能終事語甚淒楚遂以乾隆

二十四年九月三十日卒年四十有五姓陳氏一傑名也每服膺裴行險之言自製字曰傲唐少雲其號也先世上虞人遷仁和兩世矣娶嚴氏無子後四年卒伯兄亦無子唯季弟先卒者有三子其仲名爛今爲後將以某年某月某日葬君於某原余乃泚筆爲銘銘曰學則史教則經不一施命所丁嗚呼哀哉予忍不銘

贈中憲大夫子寧秦公墓誌銘

癸巳

乾隆三十八年秋余同年友江都秦翼以將奉其母趙太君之匱祔葬於其考中憲公之塋使使來告文昭曰卜以今歲十一月十九日吉昔先考之葬銘尙有待也今以吾母祔當合爲銘以屬于文昭於是考其家狀因

歎中憲公與恭人皆以孝友篤天倫爲足以挽薄俗而使之厚也公諱熙字子寧先世陝西三原人其遷揚州之江都至公考來劬公七世矣康熙十六年舉於鄉授中書舍人生四子公其仲也十歲而孤母鄭安人苦節撫教之公前母兩安人皆王氏後王安人生兄庠生與權公念父兄皆以儒爲業亦惟苦志讀書庶可爲劬勞報繼而家日以落伯兄與公異居公同母二弟尙幼不能治生大懼甘旨有缺不得已始棄經生業此公畢生隱憾也繼連居母與兄之喪摧毀欲絕殯葬諸費一皆身任之且撫兄之仲子賓爲子賓爲郡庠生日望其昌大先人之業愛誨備至顧又不幸早歿婦俞無子公已

自有子鬢謂鬢他日生男當後之其訓子也嚴未嘗少
有姑息朝夕必垂泣警戒曰先人世業竟忍終墜邪鬢
以乾隆十二年舉於鄉十七年壬申

恩科成進士選入詞館爲庶吉士卽乞假歸省公率之
祭中翰公之墓未至數里卽却輿步行及墓展拜且告
曰今而後差可對先人於地下矣一慟幾不能起歸而
臥病不旬日遂卒乾隆十八年五月初七日也年六十
有九娶恭人趙氏同邑歲進士候補訓導諱豫吉之第
三女也世居邵伯埭爲著姓今其地隸甘泉恭人年十
七來歸事姑孝待娣姒如同生念中憲公嗣續未廣爲
置側室熊生覺撫摩鞠育一日不忍離後就養入都攜

以自隨及間熊病亟命歸視竟賴以瘳初賓之爲子也
恭人撫之如實己出賓亡後三十年賢官湖南始舉次
子恩楚恭人諭賢曰以汝子爲兄後汝父命也兄本汝
世父子世父生時尙有二子今皆已歿無後大宗不可
絕今當以汝新生子後汝兄而仍歸宗於汝世父俟其
免乳卽歸告於廟而立之亟傳語汝嫂庶使其三十年
苦節之貞亦藉以少慰也俞旋沒卽命襁褓子成服恭
人之明於大義類若此乾隆三十七年七月十三日卒
年八十有六嗣子賓已歸宗其爲之後者復殤今舉其
見在者子二人賢由翰林院編脩歷湖南岳常澧道覺
台州臨海縣丞女三庠生陳詩高成璇庠生潘瑤其壻

也孫四恩復恩海恩誥恩蔭孫女一許字程菊生公國
學生以子貴 勅贈承德郎翰林院編修加二級 晉
贈中憲大夫恭人 敕封安人 晉贈恭人墓在揚州
城北仙源橋祖塋之旁銘曰

世澤詩書勿棄我畚精神所馮始鬱終舒庭植嘉樹殊
條同根雨露共之靡憂不蕃匪其蒸之後曷克繩之匪
其凝之後曷克承之分形同氣脾合異族嘉耦尤難交
敦互助爾子我育我孫爾續於古誰倫諸葛汜毓孝友
之德德之大者榮生考終天錫純嘏安此幽廬偕返其
真我作銘詞用式後人

文林郎施秉縣知縣朱君墓誌銘

王子

君諱履吉字旦銘朱姓松江婁縣人先世故浙產凡三
遷至今縣詳具先世誌中考諱秀文廣西柳州府通判
柳州君早年生兩子皆不育四十外始舉君愛憐倍至
幼聰慧好學以父遠宦成童卽綜理家政復銳精學業
體素弱嫡母夏安人憂其過勞也令就怡適所親示以
六法閒撫七弦以自娛遂兼通藝事年十八省父柳州
途次卽熟復法家言至則佐幕中畫有老成風柳州君
以君之習於爲政也年幾強仕遂爲援例銓授貴州鎮
遠府施秉縣知縣縣居衝途困於供億君畫有方刻
己奉公一不以累民革賦外浮派之弊而民皆樂輸恐
後其聽訟也剖決如流且化且誘兩造往往各解讎釋

忿而去修偏橋使商旅不病涉葺廨舍使官吏不侵民
居月兩期課士而士知向方甫二年善政畢舉大府方
擬以循良薦忽一夕心動亟陳情歸養未到家一舍聞
若考已先一月捐館卽號咷徒跣奔赴慟絕幾不欲生
遂得咯血疾踰年少差隨擇地安窆并建祠置田呈縣
勒石以垂久遠又推柳州君遺意浙五世以下諸塋及
金山縣丹莊祖塋親往封植各製祭器鑪鑑瓶鐙祭之屬
畢具謹虔以供時祀君之歸也年四十有一以生母孫
孺人年高家居侍養者十餘年怡怡然樂也孫孺人疾
君侍湯藥月餘日不交睫皆爲之爛先是君自祖塋祭
埽回遇疾風甚雨得疾至是新愈而孫孺人病卒不起

君哀毀骨立沈疴頓發醫者咸謂痛傷五中不靜攝將不治戚友亦引禮五十不毀之文相勸慰君聞言更戚竟於乾隆五十七年正月十二日卒於喪次年五十有五距孫孺人之沒未及一期卒前三日力起端坐書示曰遽云寡過曾引履冰五十五年勉服於膺春朝撒手去仍作打包僧一片寒松裏慈烏喚我曾蓋君考嘗航海至補陀求子遇老衲以禪語示意後生君故其言有自也又指壁間懸緘曰與我將去及斂取視外裹以麻緘以素紙細書百日髮三字蓋喪滿百日所薙髮也噫此亦全歸之道矣鄉人來會者重君說皆行哭失聲且爲之議曰曾子稱慈愛忘勞盡力而有禮大易云庸行

之謹君之敬親絜己宜受此名也私謚曰孝謹先生僉
曰然君階文林郎考不以其官封而就君之階新例也
初娶於陸繼娶蔡皆前卒又繼娶王子四人光曜子鄂
皆諸生光綸光縉一女蘭馨適青浦學生蔡光治孫二
人大源大韶女孫二人今卜於十二月二十一日乙酉
奉君匱葬於婁縣北鱗字圩祖塋之次君生前所自定
也諸孤介余年家子范公弼來請銘爲之銘曰

士有百行唯孝莫大慎厥身修唯謹斯最晉有靖節唐
有貞曜古道猶行德音孔邵循吏之名不足盡君終焉
死孝匪獨生勤婁江之濱幽宮是宅永遂瞻依祥徵烏
奕

閻考功懷庭哀辭

并序

戊子

乾隆二十二年禮部試天下士余與分校得山東一卷其辭簡淡而醇雅以爲非學有元本者不能旣呈薦主司嫌其寂寥弗善也甲乙旣定諸分校者皆退余獨抱卷上堂與主司言不宜失此士爭之竟不得時分校諸公聞有此卷爭取傳觀咸稱善秀水鄭君炳也任邱李君廉衣武進莊君本淳尤歎息不已旣撤棘言頗傳於外并有傳予爲之出涕者吾鄉陳句山先生深於文者也索此卷閱之謂當冠倫詢邑里姓名則昌樂閻循觀卽君也雖不遇而名聞京師來見余果粹然儒者氣度冲夷語不自矜詡君言試前得余所爲亡室桑孺人行

畧讀之惻惻然若有動乎中謂能質言之而情事亦曲盡也君好余文余好君文其相合亦自有不偶然者自後試屢不利君守其道自若至三十一年會試余又與分校之列揭榜日唱名至第九侍郎劉公蔭榆見君名詫於眾曰此卽往年廬其所爲抱其卷而泣者也今可爲之一鼓掌矣滿堂聞之皆大噱是年實出宐興湯君萼南之門云旣成進士分部學習得吏部考功司議事持正不苟隨人上下有齟齬之者君卒不少變今年春余失官至京師與君相見纔逾月聞君以疾請假余亟謂君盍書數語見貽乎卽他年相望數千里外見手跡如見故人君行急不果書旣而郵余一棧別無通問語

惟手書近日體驗之言見貽踐前諾也方謂君已復初及秋而凶問至矣嗚呼君內行脩學術正教人盡其誠其鄉人多能道之而臨事有執又見於居官之時胡天虐之使病病而至於不永年邪君言行之懿必不終泯泯余雖識君而不能資君爲砥礪是余之窮也夫爰爲辭以寫余哀云

古有特立獨行之士兮不隨俗以變遷余將以求夫今之人兮豈所在而皆然舍吾範以馳驅兮將詭遇而取憐置瑟而操竽兮矧方而爲員競追逐以從時兮奚本志之能堅羌始進其若斯兮吾又惡知其終焉懿若人之古處兮豈外物之可鑄吾玉固自若兮甘不字以十

年文與行若合符兮今人中而有此賢余不足以得君
兮徒兩情之惓惓巧者遇而拙者亦不終棄兮乃今而
信夫大園匪榮名之足珍兮將大任之可肩見正直之
道行兮彼遵捷徑者其言旋旣觀政於郎署兮驟升降
之是權寧使人驚吾之諤諤兮吾終抱吾之專專君以
余同草木之臭味兮余亦以君叶宮商之相宣忽長揖
以歸去兮讐乎矢之離弦旣詒我以話言兮期理道之
其研胡卽成此永訣兮悵年壽之不少延嗚呼余求友
於天下兮落落晨星之在天君今又舍我而去兮不禁
清淚之漉漉惟今之悲其實可悲兮過乎昔者之所傳
功業雖未顯融兮遺文有待於爲之編我車載脂兮將

才系生三三集 卷二十一 一
適吳而辭燕末由過君之里兮一洒涕於重泉嗚乎此
特敘余兩人之交情耳余爲後死尚思約君行之大者
以表於君之阡

孔蕙谷戶部哀辭 并序 甲辰

嗚呼君蓋天下學士之所以爲宗主者也自成進士後
嗜學轉篤服官農部恐不能卒所業亟告歸左圖右書
日有所采獲得古來遺文墜簡爲一一整齊補綴出與
友朋相質正海內學者多樂就之見聞益以富其厚於
朋友也不以死生易節東原戴君旣歿爲版行其遺書
無有散失士林尤高其義其他所梓復不下數十種扶
微振絕厥功茂焉昨歲冬孟文昭自太原南還過魯訪

君蓋不相見者星一終矣畱余止宿示余以漢隸借我以佳本餉我以新刻微見君容黯黹而多涕勸君宜少近藥餌然亦不圖有朝夕虞也今年仲春初旬忽得君不祿之赴驚噩涕零進使者而問故使者不能言其詳但言君第三郎君新就婚於金陵而歸亦以是月夭亡相去僅三日嗚呼一何酷也以君之淳懿融粹絕無瑕玼宜其享遐年膺厚福余方欲託君以身後事而何意余反爲後死者耶旣以悲君實亦自悲爰爲之詞以寫我哀

子聖人之後也仍好古而敏求釋纓紱而反初兮壺藏修以息游物固聚於所好兮祕簡恣其遐搜友朋相與

討論兮盡一時之勝流美交道之不渝兮信臭味之相
投延陵之不忘故兮我亦遺文之是收旣不負此良友
兮復表章夫前修文章天下之公器兮應學子之所求
緊余得之而暴富兮溫璀璨乎琳瑯曩吾黨有端人兮

謂余門范崧
君所師也

知子維端人之儔溯淵源而我敬兮嗟薄

俗其有此不自締交以至今兮剛歲星之一周歎合并
之不易兮隔千里而通郵渴思君而一見兮溯洙泗以
停輶喜余來而止宿兮盡永夕之綢繆思從容而展意
兮柰吾行之甚迨君年少余兩紀兮騁長途其未休猥
余珍夫敝帚兮亦將託子以去畱久懷茲而未發兮將
排比而始謀何意竟不我待兮乃一疾而不瘳余自今

無以爲質兮淚忽忽其盈眸憶合尊以歡讌兮方子獻
而我酬曾兩月之爲期兮判萬古與千秋重以叔子之
不祐兮疑與善之悠悠幸長君之繼志兮文與行其並
優與眾可追夫二鄭兮向歆遠軼於二劉少者係踵而
接武兮感不墜夫弓裘有子孫其若此兮宜亦可含笑
而無憂獻歲寓書以通問兮神爽豈或閒夫明幽茲不
能累君之行兮聊以代夫執紼者之謳嗚呼吾與君之
交其盡於此乎猶庶幾夢寐之間神彷彿而來遊

公祭汪容甫

中文 甲寅

維年月日同學友盧文弔孫志祖張燕昌梁玉繩等謹
以清酌之奠致祭於拔萃汪君容夫之靈曰吁嗟汪君

無怛而化驟聞惡耗舉皆驚詫日者相招促坐談笑曾
未浹旬銷聲埋照君實不狂而眾曰狂皮裏春秋涇渭
分明彼妄男子號召羣愚如羶集蟻如矢叢蛆世奉尊
奢君實唾弃海內正人備載簡記師門風義不忘久久

沈叔園鄭純齋兩先生

披榛拜墓遺金卹後同道爲朋端臨

劉台

懷祖

王念孫

秋士

江德

先祖金蘭誰補四庫在曾爲行祕

書大放厥辭佩玉瓊琚文章何師西京鄴下汴都臨安
未始嚙炙不恕古人指瑕蹈隙何況今人焉免勒帛眾
畏其口誓欲殺之終老田閒得與禍辭名園高枕山茶
雙植竹閣柏堂風流允嗣不死揚州而死杭州禪智山
光終焉首邱吾儕結契無論舊新聞名相思握手情親

臭味本同膠投漆中來幸天假去何怱怱一去不返饑
觀在目樽酒具陳臬某來復聞君佳兒斬然頭角庶幾
他年父書能讀魂無不之邗江之涓執紼相送涕下漣
漣嗚呼哀哉尙饗

弟子浦江戴 聰惟憲校

抱經堂文集卷第三十四終